



25. januar 2011

UPA 2011/52

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Qanoq iliornikkut akisussaassuseqartumik piujuaannartitsisumillu aalisarnermut politik-keqarnikkut qulakkeersinnaaneripput, aalisakkanit tunisassiagut nunani tamalaani akuerisaasumik MSC-mik meqqeqalersinnaanissaat nunanilu tamalaani niuerfinni pisisartut akisussaassuseqarluartumik piujuaannartitsisumillu aalisarnissamik piumasaqarfigisaanni suli unammillersinnaanissamut apeqquteqaat aallaavigalugu oqallinnissamik siunnersuut.

(Inatsisartuni ilaasortaq Niels Thomsen, Demokraatit)

Suna tamaat allangoriartorpoq. Piviusuuvoq siuligut annermik piniarneq inuuniutigisimammassuk. Piffissap ingerlanerani aalisarnek pingaaruteqartorujussuanngorpoq sulilu qitiulluinnarluni. Kalaallit Nunaanni Naatsorsueqqissaartarfiup kisitsisaataasa takutippaat, 2006-mi avammut tunisassiatta 85 %-iisa missai tassaasut aalisakkat qaleruallillu 2 mia. kr. missaanillu naleqarlutik.

Paasineqaqqavoq aalisarnek inuutissarsiutitut avatitsinniit annertuunik piumasaqaasersorfigineqartoq isiginngitsuusaanginnarneqarsinnaanngitsunik. Nunatsinniit aalisakkanik qalerualinnillu tunisassiortut nunani angisuuni niuertarfissuarnut annertuumik tunisisarput. Taakkua niuertarfissuit ilaasa piumasarisalernikuuat, aalisakkat qaleruallillu MSC-mik meqqeqassasut.

Ullumikkut atuisuniit kimigiiserfigineqarpoq, aalisarnek imatut ingerlanneqassanngitsoq amerlassutsit nungullugit imaluunniit pinngortitaq artorsillugu. MSC-p allagartaa pingasunik pingaarnertut tunngaveqarpoq, siulliit marluk tassaallutik aalisakkanik qalerualinnillu aalisagaqatigiinik piujuaannartitsisumik atuineq aamma aalisarnerup kingunerisaanik avatangiisinik ajortumee- rinissanik akornusiinnginnissaq.

Piffissami matumani suliffissuit avammut tunisassiortut soorlu Royal Greenland, Polar Seafood Kalaallit Nunaanniillu selskabit allat malugivaat annertusiartuinnartumik tunisassiami tuninis-



saat, imaammat niuertarfissuit MSC-mik meqqitalinnik pisissallutik aaliangertarmassuk. Taamaattumik raajanut tunngatillugu assut ajornartorsiutaavoq canadamiut imaanit nillertumit raajaat MSC-mik meqqilersorsimmammata, tassami Kalaallit Nunaata tamakkununga tunngatillugu unammillertiginerpaammangu.

Tamassuma takutippaa, inuiaqatigiittut annertuumik soqutigisaqartugut, aalisarnej inuutissarsiutitut imatut aaqqissuutissagipput, piujuaannartitsinermik tunngaveqartillugu qulakkeerumallugu sulii annertuumik aalisangartatsinnik avammut tunisassiornissaq.

Neriuppunga partiit tamarmik uani akisussaassuseqartumik piujuaannartitsisumillu aalisarnikkut politikkeqarnissamut oqallinnermi kinguneqarluartussamik isummorsorlutik qulequtaq aallaavigalugu peqataassasut.

Taamatut oqaaseqarlunga oqallinneq ammarpara.